

Edificio Cocolishi ta hayando su toke final

Siguiente fase ta construcccion di Plaza Padu



ORANJESTAD – Gradualmente por mira con e trabounan na e edificio nobo di Gobierno ta kedando cla. E parti mas grandi di construcccion, na encargo di ALBO Aruba N.V. ya ta tras di lomba. Awo

tur movencion ta concentra riba e parti interior di e edificio di cuater piso cu ta destina pa bira sede di e tur Ministerio cu ta forma Gobierno di Aruba. Sub contratistanan manera

di electricidad, telecomunicacion, mueble y limpieza ta trahando simultaneamente. E edificio ta hayando e ultimo tokenan tanto di paden como di pafu mientras cu ta prepara e tereno rond di dje pa e infra-



estructura cu ta bira e siguiente fase di e proyecto importante aki.

Na e parti patras di e edificio nobo ta bay bin un asina yama 'Plaza Padu', dedica na nos legendario y stima Padu Lampe, co-autor di e himno nacional di Aruba. Prome Minister Mike Eman a pone enfasis pa arkitectonan inclui den e diseño un fontein cu cada ora tin movencion di awa riba ritmo di himno nacional di Aruba.

E oficina den cua Prome Minister ta sinta awor ta bira un oficina di protocol unda cu e Prome Minister di Aruba lo tene reunion y ricibi bishitantenan. Bestuurskantoor historico tambe lo wordo restaura y lo keda e entrada principal di gobernacion di Aruba. Asina ta duna elogio na e historia politico y gubernamental di Aruba. Di e manera aki, e area tambe lo bira un atraccion pa local



y bishitantenan, mientras cu tin varios edificio historico rond. Esaki ta completa un parti importante di e centro di gobernacion di pais Aruba y e centro di orguyo nacional di e hendenan di Aruba. □